

**Debat Piala Perdana Menteri Peringkat IPT Tawar RM25,000 Kepada Pemenang Bernama
4 Oktober, 2011**

KUALA LUMPUR, 4 Okt (Bernama) -- Pertandingan Debat Piala Perdana Menteri 2011 (PPM) peringkat Institusi Pengajian Tinggi (IPT) yang dianjurkan buat pertama kalinya, menawarkan hadiah wang tunai lumayan berjumlah RM25,000 untuk juara.

Bakal berlangsung di Universiti Islam Antarabangsa Malaysia (UIAM), di sini dan bermula 20 Okt hingga 25 Okt depan, 192 peserta dari 24 IPT awam (IPTA) dan IPT swasta (IPTS) akan berentap dalam dalam dua kategori debat iaitu Bahasa Melayu dan Bahasa Inggeris.

Sebelum ini, PPM hanya mengadakan pertandingan peringkat Sekolah Berasrama Penuh (SBP) sejak 1974.

Pengarah program, Mohd Khair Ngadiron, dalam sidang media mengenai pertandingan itu Selasa berkata debat bertemakan 'Generasi Muda Untuk Transformasi' merupakan refleksi kepada keterbukaan Perdana Menteri dalam setiap tindakan serta keputusan yang dibuat kerajaan.

Khair berkata debat tersebut akan didokumenkan dan disampaikan kepada kerajaan sebagai suara generasi baru.

"Penganjur juga telah memilih juri yang berkredibiliti tinggi agar pertandingan mampu menghasilkan debat yang baik," katanya.

Pertandingan anjuran MyHarapan (Youth Trust Foundation) dengan kerjasama Kementerian Pengajian Tinggi (KPT) dan UIAM dinaungi Perdana Menteri Datuk Seri Najib Tun Razak.

Sementara itu Pengerusi MyHarapan, Roslan Bakri Zakaria berkata pertandingan itu akan menganalisis kekuatan dan kelemahan setiap dasar yang diperkenalkan terutamanya Pelan Transformasi Ekonomi, Pelan Transformasi Kerajaan, Bidang Ekonomi Utama Negara (NKEA) dan Model Ekonomi Baru (MEB).

"Generasi muda akan membahaskan isu-isu yang memerlukan mereka untuk memahami dan menganalisis berdasarkan fakta dan bukan khabar angin," katanya

Beliau berkata skop perbahasan telah diberi lebih awal sebagai persediaan namun tajuk hanya akan diberitahu setengah jam sebelum pertandingan bermula

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=617714>